

1 Patras

¹ Yih khat Īsā Masīh ke rasūl Patras kī taraf se hai.

Main Allāh ke chune huon ko likh rahā hūn, duniyā ke un mehmānon ko jo Puntus, Galatiyā, Kappadukiyā, Āsiyā aur Bithuniyā ke sūbon meñ bikhre hue haiñ.

² Khudā Bāp ne āp ko bahut der pahle jān kar chun liyā aur us ke Rūh ne āp ko maḥsūs-omuqaddas kar diyā. Natīje meñ āp Īsā Masīh ke tābe aur us ke chhīrkāe gae khūn se pāk-sāf ho gae haiñ.

Allāh āp ko bharpūr fazl aur salāmatī baḥshe.

Zindā Ummīd

³ Khudā hamāre Khudāwand Īsā Masīh ke Bāp kī tārif ho! Apne azīm rahm se us ne Īsā Masīh ko zindā karne ke wasīle se hameñ nae sire se paidā kiyā hai. Is se hameñ ek zindā ummīd milī hai,

⁴ ek aisī mīrās jo kabhī nahīn saṛegī, kabhī nahīn nāpāk ho jāegī aur kabhī nahīn murjhāegī. Kyonki yih āsmān par āp ke lie mahfūz rakhī gāi hai.

⁵ Aur Allāh āp ke imān ke zariye apnī qudrat se āp kī us waqt tak hifāzat kartā rahegā jab tak āp ko najāt na mil jāe, wuh najāt jo ākhirat ke dīn sab par zāhir hone ke lie taiyār hai.

⁶ Us waqt āp k̄hushī manāēnge, go filhāl āp ko thoṛī der ke lie tarah tarah kī āzmāishoñ kā sām̄nā karke ḡham khānā paṛtā hai

⁷ tāki āp kā īmān aslī sābit ho jāe. Kyoñki jis tarah āḡ sone ko āzmā kar k̄hālīs banā detī hai usī tarah āp kā īmān bhī āzmāyā jā rahā hai, hālāñki yih fānī sone se kahīñ zyādā q̄imtī hai. Kyoñki Allāh chāhtā hai ki āp ko us din tārif, jalāl aur izzat mil jāe jab Īsā Masīh zāhir hogā.

⁸ Usī ko āp pyār karte haiñ agarche āp ne use dekhā nahīñ, aur usī par āp īmān rakhte haiñ go wuh āp ko is waqt nazar nahīñ ātā. Hāñ, āp dil meñ nāqābil-e-bayān aur jalālī k̄hushī manāēnge,

⁹ jab āp wuh kuchh pāēnge jo īmān kī manzil-e-maqsūd hai yānī apnī jānoñ kī najāt.

¹⁰ Nabī isī najāt kī talāsh aur taftīsh meñ lage rahe, aur unhoñ ne us fazl kī peshgoī kī jo Allāh āp ko dene wālā thā.

¹¹ Unhoñ ne mālūm karne kī koshish kī ki Masīh kā Rūh jo un meñ thā kis waqt yā kin hālāt ke bāre meñ bāt kar rahā thā jab us ne Masīh ke dukh aur bād ke jalāl kī peshgoī kī.

¹² Un par itnā zāhir kiyā gayā ki un kī yih peshgoiyāñ un ke apne lie nahīñ thīñ, balki āp ke lie. Aur ab yih sab kuchh āp ko unhīñ ke wasile se pesh kiyā gayā hai jinhoñ ne āsmān se bheje gae Rūhul-quds ke zariye āp ko Allāh kī k̄hushk̄habrī sunāī hai. Yih aisī bāteñ haiñ jin par farishte bhī nazar ḡalne ke ārzūmand haiñ.

Muqaddas Zindagī Guzārñā

¹³ Chunāñche zahnī taur par kamarbastā ho jāēñ. Hoshmandī se apnī pūrī ummīd us fazl par rakheñ jo āp ko Īsā Masīh ke zuhūr par baḳhshā jāegā.

¹⁴ Āp Allāh ke tābefarmān farzand haiñ, is lie un burī ḳhāhishāt ko apnī zindagī meñ jagah na deñ jo āp jāhil hote waqt rakhte the. Warnā wuh āp kī zindagī ko apne sāñche meñ ḳhāl leñgī.

¹⁵ Is ke bajāe Allāh kī mānind baneñ jis ne āp ko bulāyā hai. Jis tarah wuh quddūs hai usī tarah āp bhī har waqt muḳaddas zindagī guzāreñ.

¹⁶ Kyoñki kalām-e-muḳaddas meñ likhā hai, “Apne āp ko maḳhsūs-o-muḳaddas rakho kyoñki maiñ muḳaddas hūñ.”

¹⁷ Aur yād rakheñ ki āsmānī Bāp jis se āp duā karte haiñ jānibdārī nahīñ kartā balki āp ke amal ke mutābiq āp kā faislā karegā. Chunāñche jab tak āp is duniyā ke mehmān raheñge Ḳhudā ke ḳhauf meñ zindagī guzāreñ.

¹⁸ Kyoñki āp ḳhud jānte haiñ ki āp ko bāpdādā kī bemānī zindagī se chhurāne ke lie kyā fidyā diyā gayā. Yih sone yā chāñdī jaisī fāñī chīz nahīñ thī

¹⁹ balki Masīh kā qīmtī ḳhūñ thā. Usī ko benuqs aur bedāgh lele kī haisiyat se hamāre lie qurbān kiyā gayā.

²⁰ Use duniyā kī taḳhlīq se peshtar chunā gayā, lekin in aḳhirī dinoñ meñ āp kī ḳhātir zāhir kiyā gayā.

²¹ Aur us ke wasīle se āp Allāh par imān rakhte haiñ jis ne use murdoñ meñ se zindā karke izzat-o-jalāl diyā tāki āp kā imān aur ummīd Allāh par ho.

²² Sachchāī ke tābe ho jāne se āp ko maḵsūs-o-muqaddas kar diyā gayā aur āp ke dilon̄ meñ bhāiyon̄ ke lie Beriyā muhabbat ḍālī gaī hai. Chunāñche ab ek dūsre ko ḵhulūdīlī aur lagan se pyār karte raheñ.

²³ Kyoñki āp kī nae sire se paidāish huī hai. Aur yih kisī fānī bij kā phal nahīñ hai balki Allāh ke lāfānī, zindā aur qāym rahne wāle kalām kā phal hai.

²⁴ Yoñ kalām-e-muqaddas farmātā hai,
“Tamām insān ghās hī haiñ,
un kī tamām shān-o-shaukat janglī phūl kī mānind hai.

Ghās to murjhā jātī aur phūl gir jātā hai,

²⁵ lekin Rab kā kalām abad tak qāym rahtā hai.”

Mazkūrā kalām Allāh kī ḵhushḵhabrī hai jo āp ko sunāī gaī hai.

2

Zindā Patthar aur Muqaddas Qaum

¹ Chunāñche apnī zindagī se tamām tarah kī burāī, dhokebāzī, riyākārī, hasad aur buhtān nikāleñ.

² Chūñki āp naumaulūd bachche haiñ is lie ḵhālis ruhānī dūdh pīne ke ārzūmand raheñ, kyoñki ise pīne se hī āp baḗhte baḗhte najāt kī naubat tak pahuñcheñge.

³ Jinhoñ ne Ḵhudāwand kī bhalāī kā tajrabā kiyā hai un ke lie aisā karnā zarūrī hai.

⁴ Ḵhudāwand ke pās āeñ, us zindā patthar ke pās jise insānon̄ ne radd kiyā hai, lekin jo Allāh ke nazdīk chunīdā aur qīmtī hai.

⁵ Aur āp bhī zindā patthar haiñ jin ko Allāh apne ruhānī maqdis ko tāmīr karne ke lie istemāl kar rahā hai. Na sirf yih balki āp us ke maḥsūs-o-muqaddas imām haiñ. Īsā Masīh ke wasīle se āp aisī ruhānī qurbāniyāñ pesh kar rahe haiñ jo Allāh ko pasand haiñ.

⁶ Kyoñki kalām-e-muqaddas farmātā hai,
“Dekho, mainī Siyyūn meñ ek patthar rakh detā hūñ,

kone kā ek chunīdā aur qīmtī patthar.

Jo us par īmān lāegā

use sharmindā nahīñ kiyā jāegā.”

⁷ Yih patthar āp ke nazdīk jo īmān rakhte haiñ beshqīmat hai. Lekin jo īmān nahīñ lāe unhoñ ne use radd kiyā.

“Jis patthar ko makān banāne wāloñ ne radd kiyā

wuh kone kā buniyādī patthar ban gayā.”

⁸ Nīz wuh ek aisā patthar hai

“Jo ṭhokar kā bāis banegā,

ek chaṭṭāñ jo ṭhes lagne kā sabab hogī.”

Wuh is lie ṭhokar khāte haiñ kyoñki wuh kalām-e-muqaddas ke tābe nahīñ hote. Yihī kuchh Allāh kī un ke lie marzī thī.

⁹ Lekin āp Allāh kī chunī huī nasl haiñ, āp āsmānī Bādshāh ke imām aur us kī maḥsūs-o-muqaddas qaum haiñ. Āp us kī milkiyat ban gae haiñ tāki Allāh ke qawī kāmōñ kā elān karen, kyoñki wuh āp ko tārīkī se apnī hairatangez raushnī meñ lāyā hai.

¹⁰ Ek waqt thā jab āp us kī qaum nahīñ the, lekin ab āp Allāh kī qaum haiñ. Pahle āp par

rahm nahīn huā thā, lekin ab Allāh ne āp par apne rahm kā izhār kiyā hai.

Allāh ke Ḳhādim

¹¹ Azīzo, āp is duniyā meñ ajnabī aur mehmān haiñ. Is lie maiñ āp ko tākīd kartā hūñ ki āp jismānī ḳhāhishāt kā inkār karen. Kyoñki yih āp kī jān se laṭī haiñ.

¹² Ḡhairīmāndāroñ ke darmiyān rahte hue itnī achchhī zindagī guzāreñ ki go wuh āp par ḡhalat kām karne kī tohmat bhī lagāeñ to bhī unheñ āp ke nek kām nazar āeñ aur unheñ Allāh kī āmad ke dīn us kī tamjīd karnī paṛe.

¹³ Ḳhudāwand kī ḳhātir har insānī iḳhtiyār ke tābe raheñ, ḳhāh bādshāh ho jo sab se ālā iḳhtiyār rakhne wālā hai,

¹⁴ ḳhāh us ke wazīr jinheñ us ne is lie muḡarrar kiyā hai ki wuh ḡhalat kām karne wāloñ ko sazā aur achchhā kām karne wāloñ ko shābāsh deñ.

¹⁵ Kyoñki Allāh kī marzī hai ki āp achchhā kām karne se nāsamajh logoñ kī jāhil bātoñ ko band karen.

¹⁶ Āp āzād haiñ, is lie āzādānā zindagī guzāreñ. Lekin apnī āzādī ko ḡhalat kām chhupāne ke lie istemāl na karen, kyoñki āp Allāh ke ḳhādim haiñ.

¹⁷ Har ek kā munāsib ehtirām karen, apne bahan-bhāiyōñ se muhabbat rakheñ, Ḳhudā kā ḳhauf māneñ, bādshāh kā ehtirām karen.

Masīh ke Dukh kā Namūnā

¹⁸ Ai ḡhulāmo, har lihāz se apne mālikoñ kā ehtirām karke un ke tābe raheñ. Aur yih sulūk

na sirf un ke sāth ho jo nek aur narmdil haiñ balki un ke sāth bhī jo zālim haiñ.

¹⁹ Kyoñki agar koī Allāh kī marzī kā k̄hayāl karke be'insāf taklif kā ḡham sabar se bardāsht kare to yih Allāh kā fazl hai.

²⁰ Beshak is meñ faḡhr kī koī bāt nahiñ agar āp sabar se piṭāī kī wuh sazā bardāsht karen jo āp ko ḡhalat kām karne kī wajah se milī ho. Lekin agar āp ko achchhā kām karne kī wajah se dukh sahnā paṛe aur āp yih sazā sabar se bardāsht karen to yih Allāh kā fazl hai.

²¹ Āp ko isī ke lie bulāyā gayā hai. Kyoñki Masīh ne āp kī k̄hātir dukh sahne meñ āp ke lie ek namūnā chhoṛā hai. Aur wuh chāhtā hai ki āp us ke naqsh-e-qadam par chalen.

²² Us ne to koī gunāh na kiyā, aur na koī fareb kī bāt us ke muñh se niklī.

²³ Jab logoñ ne use gāliyāñ dīñ to us ne jawāb meñ gāliyāñ na dīñ. Jab use dukh sahnā paṛā to us ne kisī ko dhamkī na dī balki us ne apne āp ko Allāh ke hawāle kar diyā jo insāf se adālat kartā hai.

²⁴ Masīh k̄hud apne badan par hamāre gunāhoñ ko salīb par le gayā tāki ham gunāhoñ ke etibār se mar jāen aur yoñ hamārā gunāh se tālluq k̄hatm ho jāe. Ab wuh chāhtā hai ki ham rāstbāzī kī zindagī guzāren. Kyoñki āp ko usī ke zaḡhmoñ ke wasīle se shafā milī hai.

²⁵ Pahle āp āwārā bheṛoñ kī tarah āwārā phir rahe the, lekin ab āp apnī jānoñ ke charwāhe aur nigarān ke pās lauṭ āe haiñ.

3

Bīwī aur Shauhar

¹ Isī tarah āp bīwiyōñ ko bhī apne apne shauhar ke tābe rahnā hai. Kyoñki is tarah wuh jo īmān nahīñ rakhte apnī bīwī ke chāl-chalan se jīte jā sakte haiñ. Kuchh kahne kī zarūrat nahīñ rahegī

² kyoñki wuh dekheñge ki āp kitnī pākīzagī se Ḳhudā ke ḳhauf meñ zindagī guzartī haiñ.

³ Is kī fikr mat karnā ki āp zāhirī taur par ārāstā hoñ, masalan khās taur-tarīqōñ se gundhe hue bāloñ se yā sone ke zewar aur shāndār libās pahne se.

⁴ Is ke bajāe is kī fikr kareñ ki āp kī bātinī shakhsiyat ārāstā ho. Kyoñki jo rūh narmdilī aur sukūn ke lāfānī zewarōñ se sajī huī hai wuhī Allāh ke nazdīk beshqīmat hai.

⁵ Māzī meñ Allāh par ummīd rakhne wālī muqaddas ḳhawātīn bhī isī tarah apnā singār kiyā kartī thīñ. Yoñ wuh apne shauharōñ ke tābe rahīñ,

⁶ Sārā kī tarah jo apne shauhar Ibrāhīm ko āqā kah kar us kī māntī thī. Āp to Sārā kī beṭiyāñ ban gaī haiñ. Chunāñche nek kām kareñ aur kisī bhī chīz se na ḍareñ, ḳhāh wuh kitnī hī ḍarāunī kyoñ na ho.

⁷ Is tarah lāzim hai ki āp jo shauhar haiñ samajh ke sāth apnī bīwiyōñ ke sāth zindagī guzāreñ, yih jān kar ki yih āp kī nisbat kamzor haiñ. Un kī izzat kareñ, kyoñki yih bhī āp ke sāth zindagī ke fazl kī wāris haiñ. Aisā na ho ki

is meñ beparwāi karne se āp kī duāiyā zindagī meñ rukāwaṭ paidā ho jāe.

Nek Zindagī Guzārne kī Wajah se Dukh

⁸ Ākhir meñ ek aur bāt, āp sab ek hī soch rakheñ aur ek dūsre se tālluqāt meñ hamdardī, pyār, rahm aur halīmī kā izhār karen.

⁹ Kisī ke ḡhalat kām ke jawāb meñ ḡhalat kām mat karnā, na kisī kī ḡaliyoñ ke jawāb meñ ḡālī denā. Is ke bajāe jawāb meñ aise shaḡhs ko barkat deñ, kyonki Allāh ne āp ko bhī is lie bulāyā hai ki āp us kī barkat wirāsat meñ pāeñ.

¹⁰ Kalām-e-muqaddas yon farmātā hai,

“Kaun maze se zindagī guzārnā
aur achchhe din deḡhnā chāhtā hai?

Wuh apnī zabān ko sharīr bāteñ karne se roke
aur apne hoñṭoñ ko jhūṭ bolne se.

¹¹ Wuh burāi se muñh pher kar nek kām kare,
sulah-salāmatī kā tālib ho kar
us ke picḡhe lagā rahe.

¹² Kyonki Rab kī ānkheñ rāstbāzoñ par lagī
rahtī haiñ,

aur us ke kān un kī duāoñ kī taraf māyl haiñ.

Lekin Rab kā chehrā un ke ḡhilāf hai jo ḡhalat
kām karte haiñ.”

¹³ Agar āp nek kām karne meñ sargarm hoñ to
kaun āp ko nuqsān pahuñchāegā?

¹⁴ Lekin agar āp ko rāst kām karne kī wajah se
dukh bhī uṭhānā pare to āp mubārak haiñ. Un
kī dhamkiyoñ se mat ḡarnā aur mat ḡhabrānā

¹⁵ balki apne diloñ meñ Ḳhudāwand Masīh ko
maḡhsūs-o-muqaddas jāneñ. Aur jo bhī āp se
āp kī Masīh par ummīd ke bāre meñ pūchhe har
waqt use jawāb dene ke lie taiyār raheñ. Lekin

narmdili se aur Kḥudā ke kḥauf ke sāth jawāb den.

16 Sāth sāth āp kā zamīr sāf ho. Phir jo log āp ke Masīh meñ achchhe chāl-chalan ke bāre meñ gḥalat bāteñ kar rahe haiñ unheñ apnī tohmat par sharm āegī.

17 Yād rahe ki gḥalat kām karne kī wajah se dukh sahne kī nisbat behtar yih hai ki ham nek kām karne kī wajah se taklīf uṭhāeñ, basharteki yih Allāh kī marzī ho.

18 Kyoñki Masīh ne hamāre gunāhoñ ko miṭāne kī kḥātir ek bār sadā ke lie maut sahī. Hāñ, jo rāstbāz hai us ne yih nārāstoñ ke lie kiyā tāki āp ko Allāh ke pās pahuñchāe. Use badan ke etibār se sazā-e-maut dī gai, lekin Rūh ke etibār se use zindā kar diyā gayā.

19 Is Rūh ke zariye us ne jā kar qaidī rūhoñ ko paighām diyā.

20 Yih un kī rūh thīñ jo un dinoñ meñ nāfarmān the jab Nūh apnī kashtī banā rahā thā. Us waqt Allāh sabar se intazār kartā rahā, lekin ākḥirkār sirf chand ek log yāñī aṭḥ afrād pāñī meñ se guzar kar bach nikle.

21 Yih pāñī us bapṭisme kī taraf ishārā hai jo is waqt āp ko najāt dilātā hai. Is se jism kī gandagī dūr nahīñ kī jāti balki bapṭismā lete waqt ham Allāh se arz karte haiñ ki wuh hamārā zamīr pāk-sāf kar de. Phir yih āp ko Īsā Masīh ke jī uṭhne se najāt dilātā hai.

22 Ab Masīh āsmān par jā kar Allāh ke dahne hāth baiṭh gayā hai jahāñ farishte, ikḥtiyār wāle aur quwwateñ us ke tābe haiñ.

4

Tabdīlshudā Zindagiyān

¹ Ab chūnki Masīh ne jismānī taur par dukh uṭhāyā is lie āp bhī apne āp ko us kī-sī soch se lais karen. Kyoṅki jis ne Masīh kī ḳhātir jismānī taur par dukh sah liyā hai us ne gunāh se nipaṭ liyā hai.

² Natīje meṅ wuh zamīn par apnī bāqī zindagī insān kī burī ḳhāhishāt pūrī karne meṅ nahīn guzāregā balki Allāh kī marzī pūrī karne meṅ.

³ Māzī meṅ āp ne kāfī waqt wuh kuchh karne meṅ guzārā jo ḡhairīmāndār pasand karte haiṅ yānī aiyāshī, shahwatparastī, nashābāzī, sharābnoshī, rangraliyōṅ, nāch-rang aur ḡhin-aunī butparastī meṅ.

⁴ Ab āp ke ḡhairīmāndār dost tājjub karte haiṅ ki āp un ke sāth mil kar aiyāshī ke is tez dhāre meṅ chhalāṅg nahīn lagāte. Is lie wuh āp par kufr bakte haiṅ.

⁵ Lekin unheṅ Allāh ko jawāb denā paṛegā jo zindōṅ aur murdoṅ kī adālat karne ke lie taiyār kharā hai.

⁶ Yihī wajah hai ki Allāh kī ḳhushḳhabrī unheṅ bhī sunāi gāi jo ab murdā haiṅ. Maḳsad yih thā ki wuh Allāh ke sāmne Rūh meṅ zindagī guzār sakeṅ agarche insānī lihāz se un ke jism kī adālat kī gāi hai.

Apnī Nematoṅ se Ek Dūsre kī Ḳhidmat Karen

⁷ Tamām chīzoṅ kā ḳhātmā qarīb ā gayā hai. Chunānche duā karne ke lie chust aur hoshmand raheṅ.

⁸ Sab se zarūrī bāt yih hai ki āp ek dūsre se lagātār muhabbat rakheñ, kyonki muhabbat gunāhoñ kī baṛī tādād par pardā ḍāl detī hai.

⁹ Buṛbuṛāe baḡhair ek dūsre kī mehmānawāzī kareñ.

¹⁰ Allāh apnā fazl muḡhtalif nematoñ se zāhir kartā hai. Fazl kā yih intazām wafādārī se chalāte hue ek dūsre kī ḡhidmat kareñ, har ek us nemat se jo use milī hai.

¹¹ Agar koī bole to Allāh ke-se alfāz ke sāth bole. Agar koī ḡhidmat kare to us tāqat ke zariye jo Allāh use muhaiyā kartā hai, kyonki is tarah hī Allāh ko Īsā Masīh ke wasīle se jalāl diyā jāegā. Azal se abad tak jalāl aur qudrat usī kī ho! Āmīn.

Āp kī Musībat ḡhairmāmūlī Nahīn Hai

¹² Azīzo, izārasānī kī us āg par tājjub na kareñ jo āp ko āzmāne ke lie āp par ān paṛī hai. Yih mat sochnā ki mere sāth kaisī ḡhairmāmūlī bāt ho rahī hai.

¹³ Balki ḡhushī manāeñ ki āp Masīh ke dukhoñ meñ sharīk ho rahe haiñ. Kyonki phir āp us waqt bhī ḡhushī manāenge jab Masīh kā jalāl zāhir hogā.

¹⁴ Agar log is lie āp kī be'izzatī karte haiñ ki āp Masīh ke pairokār haiñ to āp mubāarak haiñ. Kyonki is kā matlab hai ki Allāh kā jalālī Rūh āp par ṡhahrā huā hai.

¹⁵ Agar āp meñ se kisī ko dukh uṡhānā paṛe to yih is lie nahīn honā chāhie ki āp qātil, chor, mujrim yā fasādī haiñ.

¹⁶ Lekin agar āp ko Masīh ke pairokār hone kī wajah se dukh uṭhānā pare to na sharmāen balki Masīh ke nām meñ Allāh kī hamd-o-sanā karen.

¹⁷ Kyonki ab waqt ā gayā hai ki Allāh kī adālat shurū ho jāe, aur pahle us ke ghar wāloñ kī adālat kī jāegī. Agar aisā hai to phir is kā anjām un ke lie kyā hogā jo Allāh kī ḡhushḡhabrī ke tābe nahīn haiñ?

¹⁸ Aur agar rāstbāz mushkil se bacheñge to phir bedīn aur gunāhgār kā kyā hogā?

¹⁹ Chunāñche jo Allāh kī marzī se dukh uṭhā rahe haiñ wuh nek kām karne se bāz na āen balki apñī jānoñ ko usī ke hawāle karen jo un kā wafādār Ḡhāliq hai.

5

Allāh kā Gallā

¹ Ab maiñ āp ko jo jamātoñ ke buzurg haiñ nasīhat karnā chāhtā hūñ. Maiñ ḡhud bhī buzurg hūñ balki Masīh ke dukhoñ kā gawāh bhī hūñ, aur maiñ āp ke sāth us āne wāle jalāl meñ sharīk ho jāūngā jo zāhir ho jāegā. Is haisiyat se maiñ āp se apīl kartā hūñ,

² gallābān hote hue Allāh ke us galle kī dekh-bhāl karen jo āp ke sapurd kiyā gayā hai. Yih ḡhidmat majbūran na karen balki ḡhushī se, kyonki yih Allāh kī marzī hai. Lālch ke baḡhair pūrī lagan se yih ḡhidmat saranjām deñ.

³ Jinheñ āp ke sapurd kiyā gayā hai un par hukūmat mat karnā balki galle ke lie achchhā namūnā banen.

⁴ Phir jab hamārā sardār gallābān zāhir hogā to āp ko jalāl kā ḡhairfānī tāj milegā.

⁵ Isī tarah lāzim hai ki āp jo jawān haiñ buzurgon ke tābe raheñ. Sab inkisārī kā libās pahan kar ek dūsre kī khidmat karen, kyonki Allāh maḡhrūron kā muqābalā kartā lekin farotanon par mehrbānī kartā hai.

⁶ Chunānche Allāh ke qādir hāth ke nīche jhuk jāeñ tāki wuh mauzūn waqt par āp ko sarfarāz kare.

⁷ Apnī tamām pareshāniyān us par ḍāl deñ, kyonki wuh āp kī fikr kartā hai.

⁸ Hoshmand raheñ, jāgte raheñ. Āp kā dushman Iblīs garajte hue sherbabar kī tarah ghūmtā-phirtā aur kisī ko haṛap kar lene kī talāsh meñ rahtā hai.

⁹ Īmān meñ mazbūt rah kar us kā muqābalā karen. Āp ko to mālūm hai ki pūrī duniyā meñ āp ke bhāi isī qism kā dukh uṭhā rahe haiñ.

¹⁰ Lekin āp ko zyādā der ke lie dukh uṭhānā nahīn paṛegā. Kyonki har tarah ke fazl kā Khudā jis ne āp ko Masīh meñ apne abadī jalāl meñ sharik hone ke lie bulāyā hai wuh khud āp ko kāmiliyat tak pahuñchāegā, mazbūt banāegā, taqwiyat degā aur ek ṭhos buniyād par khaṛā karegā.

¹¹ Abad tak qudrat usī ko hāsil rahe. Āmīn.

Ākhirī Salām

¹² Maiñ āp ko yih muḡhtasar khat Silwānus kī madad se likh rahā hūñ jise maiñ wafādār bhāi samajhtā hūñ. Maiñ is se āp kī hauslā-afzāi aur is kī tasdīq karnā chāhtā hūñ ki yihī Allāh kā haqīqī fazl hai. Is par qāym raheñ.

¹³ Bābal meñ jo jamāt Allāh ne āp kī tarah chunī hai wuh āp ko salām kahtī hai, aur isī tarah merā beṭā Marqus bhī.

¹⁴ Ek dūsre ko muhabbat kā bosā denā.
Āp sab kī jo Masīh meñ haiñ salāmatī ho.

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30